



20. august 2021

UKA 2021/72

Inatsisartut suleriaasianni § 33 tunngavigalugu matumuuna aalajangiiffigisassatut siunnersuuteqarpunga:

**Uani qinigaaffimmi Ilulissani GUX-imik pilersitsinissamut suliaqarnissamik Naalakkersuisut
peqquneqarnissaannik Inatsisartunut aaliangiiffigisassatut siunnersuut.**

(Inatsisartunut ilaasortaq Nivi Olsen, Demokraatit)

Tunngavilersuut

Demokraatit kissaatigaat, Ilulissani GUX-imik pilersitsisoqarnissaa. Isertugaataanngilaq, inuuusuttorpassuit angerlarsimaffimminni toqqisisimanarisaminniiginnarnissartik kissaatigisaraat, ukiukillutik ilinniakkaminnik aallartitsissagaangamik.

Ilulissat nunatsinni illoqarfiit annersaasa pingajoraat, inuuusuttulli maanngaaneersut ukiukillutik angerlarsimaffimminniik nuuttariaqartarput, GUX-imi ilinniarnissartik kissaatigigaangamikku. Imaaleriaannaavoq, inuuusuttut arlallit Ilulissaneersut GUX-imi atuarnissaraluartik tamanna pissutigalugu kissaatigiunnaartaraat. Demokraatit isumaat malillugu tamanna ajornartorsiutaavoq, taamaaliornerup qaffasissumik ilinniagaqartussaagaluit pinngitsoortissammagit.

Maani inersuarmi isumaqatigiinngittaqaagut, imaattaporli, tamatta suliniuteqartarluta, maani nunatsinni ilinniarnerup qaffassarnissaanut qulakkeerinninnissamut isumaqatigiittarluta.

Tassunga atatillugu inuuusuttut ilinniagaqarnissaat GUX ilanngullugu pingaartorujussuuvoq, inuuusuttut ilinniagaasa, ilinniartut ilinniakkanut ingerlariaqqifiusunut piareersarfisarmatigit, tassanilu qulakkeerlugu ilinniakkamik ingerlanerani ilisimasanik piginnaasanillu peqalernissaat fagitigut ilisimasaqruarneq fagillu ataqtiginnerisa ilisimallualernissaat.

Allatut oqaatigalugu, ilinniartut kajumissuseqalernissaat GUX-ip naammassinissaanut iluatsitsilluarnissamullu inuttut, kulturikkut oqaatsitigullu inissisimanerat apeqquaatinngagu. GUX-imi ilinniartut amerlanerpaat naammassinninnerisigut aammalu uniinnartartut annikillinerisigut, inuttut inuiaqatigiittullu pitsaanerpaamik kinguneqassaaq.

Inuiaqatigiittut inuuusuttagut ilinnialernissaannut pissutsit pitsaanerpaat neqeroorutigisariaqarpavut. Isumaqarpunga ullumikkut, illoqarfiit annersaasa pingajuanni inuuusuttagut sumiginnarigut, ukiukillutik nuuttariaqartarmata.

Demokraatit tamakku tunngavigalugit kissaatigaa, aaqqiissasugut, Ilulissani GUX-imik pilersitsisinnaanngorluta. GUX namminerisamik suliffeqarfiusoq amerlanerussutillit akuerisinnaanngippassuk, Ilulissani GUX-imik pilersitsiniarsinnaavugut GUX Aasianni immikkoortuatut. Tamannali aaqqiissutaaggallartuusariaqarpoq suliap ingerlanerani.

Demokraatit neriuutigaat amerlanerussuteqartut siunnersuut Naalakkersuisunit aammalu maani Inatsisartuni partiinit tapersorsorneqassasoq.



Aningaasatigut allaffissornikkullu pisortanut kingunissai

§ 37 tunngavigalugu apeqqummut normu 39/2021 Naalakkersuisut ima ilisimatitsipput:

"Nalilerneqarpoq, Ilulissani ilinniarnertuunngorniarfimmik pilersitsinermi atuarfimmik tallimanik sammivilimmik minnerpaamik klassinut 15-inut, ukiunut pingasunut agguakkamik sananissaq pisariaqassasoq. Naatsorsuutigissagaanni, klassi ataaseq 24-nik ilinniartoqassasoq, ininik ilinniartunut 360-inut pisariaqartitsisoqassaaq. Naatsorsuutigineqarpoq, sanaartugaq, atuarfimmik taama annertussusilik, 5.000 m²-iussasoq 229.008.000 koruuninik akeqarluni"

Taaku saniatigut Naalakkersuisut akissumminni tikkuaapait, Ilulissani GUX-imik pilersitsineq illoqarfimmi ilinniartut ineqarfissaannik annertunermik pisariaqartitsinermik pilersitsissasoq. Aningaasartuut taanna 570 millioner koruuningajannut nalilerneqarpoq.

Taamatullu Naalakkersuisut nalilerpaat, siunissami ingerlatsinermut aningaasartuutit minnerpaamik ukiumut 27.750.000 koruuniussasut.

Aammalu siunnersuut manna nunatsinni ilinniarnertuunngorniarnfinni ilinniartoqarnermut kinguneqartussatut naatsorsuutigalugu minnerunngitsumik GUX Aasiannut, GUX-it ilanerisa allani piffinni ilinniartunik ikinnerulersitsissamat.

Namminersorlutik inuussutissarsiuteqartunut aningaasatigut allaffissornikkullu kingunissai

Soqanngilaq

Innuttaasunut aningaasatigut allaffissornikkullu kingunissai

Ilulissani inuusuttut illoqarfisaminni ilinniarsinnaalissapput, taamaaliornerullu kingunerissavaa, inuusuttut amerlanerit ilinniagaqalernerat. Taamatullu GUX-imi taamaatiinnartartut ikilissapput Ilulissani inuusuttut akornanni illoqarfisaminni ilinniarnissaminnik periarfissaqalissagunik.